

Jornada orsamentál OJE tinan 2021

Governu, liuhusi Ministériu Finansas, organiza ona, iha loron 4 fulan-agostu tinan 2020, Jornada Orsamentál sira, semináriu ida-ne'ebé marka inísiu husi preparasaun Orsamentu Jerál Estadu (OJE) tinan 2021 nian, iha auditóriu Xanana Gusmão, iha Ministériu Finansas, iha Dili.

Semináriu, ho tema “Orsamentu hodi rekupera no reforsa dezvoltimentu” ne'e, ninia objetivu prinsipál mak atu diskute prioridade nasional sira ne'ebé bazeia ba Programa Governu nian, Planu Estratéjiku Dezenvolvimentu Nasionál, Objetivu sira husi Dezenvolvimentu Sustentavel, Dezempeñu Polítika Fiskál, Impaktu KOVID-19 nian no Planu Rekuperasaun Ekonómika, atubele define envelope fiskál ida ba tinan 2021 ne'ebé adekuaudu ba nesesidade réal sira País nian.

Ministru Finansas, Fernando Hanjam, iha ninia intervensaun hateten katak semináriu ida-ne'e buka atu “halo reflesaun kona-ba Governu nia kompromisu sira ba preparasaun OJE tinan 2021 nian, atu nune'e bele hatán ba impaktu sira husi surtu COVID-19 nian, liuliu iha rekuperasaun ekonómika no mós atu asegura continuidade husi dezvoltimentu no husi prestasaun servisu públiku sira ne'ebé iha qualidade ba povu timoroan.

Primeiru-Ministru, Taur Matan Ruak, iha nia diskursu maklokek eventu ne'e nian, fó hanoin katak “tinan 2020 ne'e sai hanesan tinan ida-ne'ebé nakonu ho dezafiu”, ba dahuluk, “ho orsamentu ne'ebé la pasa iha Parlamentu Nasionál”, “ne'ebé obriga nasaun tenke serbisu iha rejime duodesimál no arranju polítiku foun ida iha Parlamentu Nasionál atubele sustenta Governasaun, sein presiza hala'o eleisaun antesipada”, hafoin mosu tan “dezastre natural sira, iha loron 13 fulan-marsu no loron 22 fulan-maiu, ne'ebé estraga sidadaun sira no Estadu nia sasán no propriedade sira, ho kustu total hamutuk besik dolar amerikanu millaun 50” no ikusliu mosu mós COVID-19, ne'ebé aleinde “fó implikasaun sanitária no risku ba saúde”, provoka “impaktu ekonómiku no sosial sira”.

Hatán ba dezafiu sira-ne'e, Xefe Governu temi kona-ba “nivel maturidade dirijente no sidadaun sira nian ne'ebé aas liután”, tanba “la'ós hasoru de'it problema sira, maibé, buka mós ninia solusaun sira”. Iha luta hasoru pandemia COVID-19 ne'e, Xefe Governu esplika katak “Governu, to'o oras ne'e, buka atu jere situasaun hodi halo balansu ida entre resposta ba kestaun saúde no resposta ba impaktu sósiu-ekonómiku sira”, iha sorin ida, ho “implementasaun medida sira ba prevensaun no kombate ba COVID-19 nian”, no iha sorin seluk, ho “implementasaun pakote medida ida ba estabilizasaun ekonómika” no ho “kriasaun Komisaun ba Elaborasaun Planu Rekuperasaun Ekonómika”.

Primeiru-Ministru hein katak “aprezentasaun ne'ebé realiza durante Jornada Orsamentál bele kontribui ho ideia sira, atu nune'e hotu-hotu bele kontribui ba definisaun prioridade sira ba OJE tinan 2021 nian”.

Durante Semináriu ne'e, partisipante sira asiste apresentasaun sira kona-ba programa, prioridade no meta sira, kona-ba dezempeñu sósiu-ekonómiku no impaktu sira husi COVID-19 ba ekonomia, kona-ba planu rekuperasaun ekonómika, kona-ba dezempeñu polítika fiskál no proposta kona-ba OJE ba tinan 2021.

Ikus liu, halo debate kona-ba prioridade nasional sira no limite másimu husi proposta OJE tinan 2021 nian.

url: <http://timor-leste.gov.tl?lang=tp&p=25328>